

Women's Club of Aruba ta lansa iniciativa "90 Mata pa 90 Aña"

Cu un Plantamento Simbolico di e prome mata.

Riba 18 di september 2024, Women's Club of Aruba (WCA) a inicia nan proyecto "90 Mata pa 90 Aña" en conexion cu celebracion di su 90 aniversario sirbiendo nos isla. Cu un plantamento simbolico di e prome mata na Biblioteca Nacional Aruba – Arubiana/ Caribiana den Bachstraat kier enfoca riba mehoracion di Medio Ambiente na Aruba y pa laga un herencia duradero pa e generacion di futuro.



E acto di plantamento no solamente ta simbolisa e raiznan firme cu WCA tin den nos comunidad, pero tambe su esfuerso continuo pa yuda nos medio ambiente. Durante e periodo di e directiva di 2024-2025, lo planta 90 mata na diferente lugá riba Aruba.

E evento a tuma lugá den presencia di miembronan di WCA, y bishitanan distingui for di Washington, presidente Internacional di General Federation of Women's Clubs (GFWC), Sra. Suellen Brazil y presidente Electo Sra. Wendy Carriker, famia di Sra. Quita Croes (dfm), prome presidente local di WCA 1975 – 1976, famia di Sra. Marie Thérèse Croes (dfm) Presidente WCA 1973 – 1974 /

1985 – 1986 / 1986 – 1987, Sra. Astrid Britten, directora di Biblioteca Nacional Aruba, Sra. Zetsia Ponson, BNA Dept. Arubiana/ Caribiana Coleccion Special como tambe miembronan di Fundacion Ban Lanta y Planta.

Durante su discurso di apertura, Sra. Reina Geerman, presidente di WCA, a enfatisa e importancia di plantamento di mata local tanto como un simbolo di crecimiento y sostenibilidad, como tambe pa enfatisa e compromiso di WCA pa cu Aruba. Nos tema di awe, "90 Mata pa 90 Aña, no ta solamente pa honra nos pasado, pero tambe pa inverti den futuro di nos isla stima", Sra. Geerman a expresa.

E plantamento di e prome

mata tabata posibel danki na un colaboracion cu "Ban Lanta y Planta" representa pa Sra. Anita Mijts-Aerts, Sra. Desiree Emerencia y Aruba Conservation Foundation, representa pa Sra. Natasha Silva y miembro di WCA Sra. Jan Oduber, kende a propone e iniciativa bunita aki. Sra. Anita Mijts-Aerts a duna

informacion valioso tocante e cuido y sostenibilidad di e mata di Aruba cu a planta durante e ceremonia na "Palo di Boonchi". Tur mata cu lo planta ta matanan indigeno di Aruba. Pa finalisa, Sra. Geerman a gradeci tur hende cu a contribui na e evento aki y a subraya e importancia di sosten

di comunidad pa cu exito di e proyecto aki.

Pa mas informacion di WCA por bishita nos website womensclubofaruba.org, por manda e-mail na arubawca@gmail.com of por sigui nos riba nos plataforma social manera Facebook, Instagram of LinkedIn.

Aruba Bank ta gradici tur empleado y nan famia cu a yega hunto pa e "Coastal Cleanup Day" na Rincon Beach

Organiza pa Banco Central di Aruba



Aruba Bank ta expresa su gratitud na tur empleado y nan famia cu a yega hunto pa limpia costa na Rincon Beach durante e "Coastal Cleanup Day" organiza pa Banco Central di Aruba.

E esfuerso di cada participante a haci un gran diferencia pa proteha nos dushi isla. Hunto, nos ta tene Aruba limpi pa e futuro generacionnan, y nos por sigui disfruta di nos medio ambiente limpi y sostenibel pa hopi aña mas.

Aruba Bank ta gradici Banco Central pa e invitacion.

